

Bil. 17

Selasa

26 Oktober 2021



MALAYSIA

PENYATA RASMI PARLIMEN

Parliamentary Debates

KAMAR KHAS

Special Chamber

**PARLIMEN KEEMPAT BELAS
PENGAL KEEMPAT
MESYUARAT KEDUA**

K A N D U N G A N

UCAPAN DI BAWAH USUL BERKENAAN PERKARA TADBIR KERAJAAN [P.M. 17]:

- **Masalah Banjir Kilat di Jalan Sungai Tiram
Menghala ke Kampung Bukit Dagang Sungai Tiram**
- *YB. Tuan Steven Choong Shiau Yoon (Tebrau)* (Halaman 1)
- **Sukan Terjunan Udara di Segamat, Johor**
- *YB. Puan Hajah Natrah Ismail (Sekijang)* (Halaman 3)

**MALAYSIA
KAMAR KHAS
PARLIMEN KEEMPAT BELAS
PENGKAL KEEMPAT
MESYUARAT KEDUA
Selasa, 26 Oktober 2021**

Mesyuarat dimulakan pada pukul 2.30 petang

DOA

*[Tuan Yang di-Pertua **mempengerusikan Mesyuarat**]*

**UCAPAN DI BAWAH USUL
BERKENAAN PERKARA TADBIR KERAJAAN (P.M. 17)**

**Masalah Banjir Kilat di Jalan Sungai Tiram
Menghala ke Kampung Bukit Dagang Sungai Tiram**

2.34 ptg.

Tuan Steven Choong Shiau Yoon [Tebrau]: Yang Berhormat Tuan Yang di-Pertua, Yang Berhormat Timbalan Menteri Pembangunan Luar Bandar, saya ingin menyampaikan hasrat para penghuni di Kampung Bukit Dagang, Kampung Pasir Salam dan kampung-kampung yang berdekatan di kawasan Sungai Tiram. Kampung Bukit Dagang merupakan sebuah penempatan gantian kepada penduduk di kawasan Kampung Plentong Tengah yang telah dirobohkan untuk tujuan pembangunan kediaman moden.

Jalan raya yang masuk ke kampung-kampung yang menggunakan Jalan Sungai Tiram seperti Kampung Bukit Dagang, Perkampungan Sungai Tiram sehingga ke Kampung Orang Asli Pasir Salam perlu menghadapi kesulitan dan bahaya. Khususnya pada musim hujan lebat di mana kawasan jalan raya mulai jambatan Sungai Tiram hingga ke Kampung Bukit Dagang akan mengalami banjir kilat menutupi permukaan jalan raya dan tidak benarkan kenderaan kecil dan sederhana lalu.

Keadaan ini membahayakan penduduk-penduduk tempatan kerana sering kali mengadu keselamatan tergugat khususnya sewaktu kecemasan yang memerlukan bantuan perubatan tidak dapat sampai dalam masa terdesak. Oleh yang demikian, saya berharap Yang Berhormat Timbalan Menteri dapat menyalurkan peruntukan menaikkan paras permukaan jalan raya satu meter tinggi dan lebih kurang 500 meter panjangnya agar air sungai tidak melimpah ke jalan raya bagi membolehkan kenderaan lalu dalam apa keadaan dengan selamat.

Semoga permohonan rakyat perkampungan Sungai Tiram dapat dipertimbangkan Yang Berhormat. Sekian, terima kasih.

2.36 ptg.

Timbalan Menteri Pembangunan Luar Bandar I [Dato' Sri Haji Abdul Rahman bin Mohamad]: *Bismillahi Rahmani Rahim. Assalamualaikum warahmatullahi wabarakatuh* dan salam sejahtera. Terima kasih Tuan Yang di-Pertua, terima kasih Yang Berhormat Tebrau.

Untuk makluman Yang Berhormat, bagi permohonan menaik taraf aras Jalan Sungai Tiram ini, kementerian ini telah meminta Jabatan Kerja Raya (JKR) untuk membuat siasatan tapak bagi penentuan skop dan kos yang bersesuaian seterusnya menyediakan *brief* permohonan projek. Dalam hal ini, JKR telah menyediakan *brief* permohonan projek ini dan kementerian ini mendapati bahawa projek menaik aras Jalan Sungai Tiram ini sesuai dilaksanakan di bawah Program Jalan Luar Bandar kementerian ini.

Bagi tujuan tersebut, pihak JKR telah menyediakan cadangan menaik taraf jalan bagi mengatasi banjir di Jalan Sungai Tiram (J8) ke Kampung Bukit Dagang, Ulu Tiram, Johor Bahru. Skop projek yang dicadangkan adalah menaik taraf jalan berturap sedia ada dengan kaedah meningkatkan ketinggian aras jalan dan bahu jalan tidak berturap yang dianggarkan sepanjang dua kilometer, membina laluan jambatan baharu, sistem saliran serta pembedung, pemasangan perabot jalan, pengalihan utiliti dan servis, pengambilan balik tanah di sebahagian lokaliti dan lain-lain yang berkaitan dengan kos dianggarkan berjumlah RM30 juta.

Oleh yang demikian, kerjasama Yang Berhormat bersama-sama kerajaan negeri adalah dimohon untuk menyenaraikan projek ini dalam senarai keutamaan negeri, supaya projek ini dapat dikemukakan kepada Unit Perancang Ekonomi, Jabatan Perdana Menteri (EPU-JPM) bagi dipertimbangkan kelulusan di bawah Rancangan Malaysia Kedua Belas, *Rolling Plan 3*.

Mohon jasa baik Yang Berhormat Tebrau agar berhubung dengan di bawah Unit Perancang Ekonomi. Kebiasaannya di peringkat-peringkat negeri, akan menyenaraikan senarai projek-projek keutamaan yang akan diangkat kepada EPU dan *insya-Allah*, bagi pihak kementerian, kita tidak menjadi halangan bagi projek ini dan telah menyediakan skop projek tersebut. Terima kasih, Tuan Yang di-Pertua.

Sukan Terjunan Udara di Segamat, Johor

2.38 ptg.

Puan Hajah Natrah Ismail [Sekijang]: Terima kasih. *Bismillahi Rahmani Rahim*. Tuan Yang di-Pertua, daerah Segamat berpotensi dalam menyumbang kepada kehadiran pelancong dari dalam mahu pun luar negara. Pelbagai keistimewaan dan tarikan boleh diketengahkan kepada pelancong untuk datang ke daerah Segamat. Antara tarikan yang ada ialah terdapatnya sukan terjunan udara (*skydive*).

Kedudukan daerah Segamat yang strategik, jauh daripada tiupan atau gangguan angin laut serta berada berdekatan dengan titik tengah Semenanjung Malaysia menjadikan kawasan ini amat sesuai untuk menjalankan aktiviti sukan terjunan udara.

Di Malaysia, sukan terjunan udara tidak diberikan penekanan dalam usaha untuk menarik pelancong dan merancakkan ekonomi setempat. Untuk makluman, daerah Segamat memiliki kawasan lapangan terbang (*airstrip*) di mana sebahagian kawasan tersebut telah dijadikan tempat bagi aktiviti sukan terjunan udara yang hanya dijalankan pada hujung minggu bergantung kepada faktor cuaca. Pihak Civil Aviation Authority of Malaysia (CAAM) juga telah memberikan kelulusan tempat bagi aktiviti sukan terjunan udara pada hujung minggu. Bahkan, mantan Menteri Besar Johor sebelum ini juga tertarik dan berminat untuk memperluaskan lagi sukan terjunan udara ini dan dijadikan sebagai sukan baharu yang wajar diceburi oleh anak muda baik daripada masyarakat setempat mahupun masyarakat seluruh negara.

Namun, hasrat ini tidak kesampaian dan tertangguh sehingga kini. Jika ditinjau di negara luar seperti Thailand, Australia dan Dubai, sukan terjunan udara memberikan pulangan yang besar kepada ekonomi negara dengan keterlibatan penerjun-penerjun dari seantero dunia. Agak sayang sekiranya sukan yang mempunyai potensi besar untuk pertumbuhan ekonomi negara tidak diketengahkan.

Jika pihak kementerian ingin melawat tempat dan mengetahui lebih lanjut berkaitan sukan terjunan udara di Segamat, saya sangat alu-alukan. Saya berharap agar kementerian dapat membantu dalam memberikan peruntukkan dana dan penekanan kepada sukan ini supaya sektor pelancongan dan galakan masyarakat dalam sukan ekstrem ini dapat diperhebat. Sekian, terima kasih.

2.41 ptg.

Timbalan Menteri Belia dan Sukan [Dato' Sri Ti Lian Ker]: Terima kasih Yang Berhormat Sekijang atas soalan dan input yang panjang.

Tuan Yang di-Pertua, pertamanya Kementerian Belia dan Sukan sangat berterima kasih atas cadangan-cadangan yang sering diutarakan oleh Ahli-ahli Yang

Berhormat bagi memastikan pembangunan industri sukan di Malaysia terus berkembang dan membangun. Menyentuh kepada cadangan Yang Berhormat Sekijang mengenai sukan terjunan udara, KBS sebenarnya sentiasa menggalakkan rakyat Malaysia khususnya anak muda untuk terlibat dalam aktiviti-aktiviti sukan ekstrem yang menguji keberanian dan ketahanan mental serta fizikal. Sekali lagi KBS menyambut baik akan keprihatinan serta idea Yang Berhormat dalam memajukan kawasan Segamat khususnya sebagai pusat sukan terjun bagi merancakkan ekonomi dan menggalakkan pelancongan sukan.

Untuk makluman Yang Berhormat, KBS pada ketika ini masih dalam perbincangan bersama Persekutuan Sukan Udara Malaysia (*Malaysia Sports Aviation Federation*)(MSAF) dan Kementerian Pelancongan, Seni dan Budaya Malaysia untuk memperbanyakkan lagi pelaksanaan aktiviti, program sukan udara pada tahun hadapan. Dengan keadaan semasa di mana kes COVID-19 semakin terkawal dan pelbagai sektor ekonomi telah beroperasi seperti sedia kala. Perkara ini dilihat selari dengan perancangan KBS untuk mengadakan kerjasama dengan Kerajaan Negeri Johor bagi menggalakkan lebih banyak persatuan dan kelab sukan berkaitan untuk mengadakan aktiviti, program-program sukan udara di kawasan tersebut melalui peruntukan bantuan dana pelaksanaan program. Sekian, terima kasih.

Tuan Yang di-Pertua: Terima kasih, Ahli-ahli Yang Berhormat, Mesyuarat Kamar Khas hari ini ditangguhkan sehingga jam 2.30 petang, Rabu, 27 Oktober 2021. *Assalamualaikum* dan selamat sejahtera.

[Kamar Khas ditangguhkan pada pukul 2.43 petang]